



Iniziativa dal pövel – planisaziun locala

Als 30 gün 2016 es entrada ün'iniziativa dal pövel suottascritta da 105 votantas e votants dal Cumün da Zernez. L'iniziativa pretenda adattamaints vi da la ledscha da fabrica uschè chi nun es plü pussibel da s-chaffir novas pussibilitats d'elavuraziun, d'explotaziun e da depositar materials da fabrica (primars e da s-chart) in cumün. Il cusgliader giuridic ha preparà ün text da la ledscha chi accumulaischa las pretaisas dals iniziants. La ledscha vain uossa trattada culs iniziants ed in seguit rinviada a l'uffizi chantunal per la preexaminaziun. Davo quist pass segua la publicaziun da la procedura da partecipaziun. La ledscha vain lura trattada ad üna radunanza cumünala e rinviada per la decisiun finala a la votaziun a l'urna.

Organigram dal Cumün da Zernez

In seguit a l'integraziun da la scoula aint l'organisaziun cumünala es gnü adattà l'organigram dal cumün. Actualmaing ha il Cumün da Zernez 75 impiegadas ed impiegats chi lavuran per ün pensum total da raduond 51 plazzas plainas, inclus la scoula.

Uorden da gestiun

In connex cun l'integraziun da la scoula aint l'organisaziun cumünala ha stuvü gnir adattà eir l'uorden da gestiun cumünal. Per pudair reagir plü svelt in cas extraordinaris, sun implü eir gnüdas dozadas las cumpetenzas finanzialas da la direcziun operativa per expensas na büdschetadas.

Uorden da finanzas

Per chi saja in avegnir amo plü cler chi chi ha che cumpetenzas finanzialas, es gnü s-chaffi ün uorden da finanzas. Tal explicha las cumpetenzas finanzialas sur tuot la structura cumünala oura, da la votaziun a l'urna, radunanza cumünala, suprastanza cumünala, direcziun operativa, manaders da secziuns e mainascoula, manaders da secturs fin pro manaders da gestiuns e magisters. Tuot las expensas tenor il quint da success pon gnir deliberadas da la direcziun operativa. Las expensas dal quint d'investiziun han da gnir deliberadas da la suprastanza cumünala. Il nouv uorden da finanzas pel Cumün da Zernez es gnü approvà ed es entrà in vigur als 1. october 2016.

Perimeter da revitalisaziun d'auas – consultaziun

L'uffizi da la natüra e l'ambiant dal chantun Grischun ha invidà als cumüns da tour posiziun a regard il perimeter surlavurà da revitalisaziun d'auas. Ils respunsabels dal Cumün da Zernez han analisà ils plans e formulà diversas correcturas per diminuir la surfatscha dal perimeter da revitalisaziun d'auas. La suprastanza ha deliberà las propostas per inoltrar ils giavüschs a l'uffizi chantunal.

Planisaziun da quartier Muglinè – facturaziun da cuosts

Ils cuosts da procedura e da planisaziun dal plan da quartier Muglinè sun uossa cuntschaints. Tals sun plü ots co'l credit da planisaziun approvà da la radunanza cumünala dals 20 avuost 2010. Quist fat fich dischagreabel es d'attribuir a cuosts da planisaziun ed a cuosts da cusglianza giuridica chi sun gnüts chaschunats davo l'entrada da recuors süllas prümas duos publicaziuns dal plan da quartier. Simils cuosts nu sun pussibels da preverer ouravant e's basan principalmaing sün lavurs chi sun gnüdas chaschunadas da terzs. La suprastanza ha deliberà la procedura da consultaziun in connex culla facturaziun dals cuosts da procedura e da planisaziun dal plan da quartier Muglinè als possessurs da las parcellass pertoccas.

Pumpiers Zernez – nouv contrat a regard lö da salvamaint sül binari

La sgüranza d'edifizis dal Grischun (GVG) ha elavurà ün concept da sgürezza per tuot il traget da la Viafier Retica. Eir ils Pumpiers Zernez sun part da quist concept e saran in avegnir dasper il tunnel da Vereina eir amo respunsabels pel salvamaint sül traget da la Viafier Retica tanter S-chanf e Scuol. Il contrat correspondent, chi regla tuot ils detagls, es gnü sancziunà.

Forz'electricca – definiziun "contribuziun al man public" per l'on 2017

Minch'on ston ils cumüns definir l'import chi vain indemnisà pels drets da passagi/transport d'energia, la "contribuziun al man public". Ils abitants da las fracziuns da Zernez e Brail pajaivan fin uossa 0.6 raps/ukw, Susch e Lavin 1.0 raps/ukw. La suprastanza ha decis d'armonisar pel 2017 quist import per tuot las fracziuns sün 0.6 raps/ukw. L'import da 1.5 raps/ukw pel proget Zernez Energia 2020 nun es pertoc da quist müdamaint e vain inchaschè eir in avegnir be illa fracziun da Zernez.

Tablas d'infuormaziun digitalas illas fracziuns

La pagina d'internet nouva dal Cumün da Zernez es la basa per realisar las tablas d'infuormaziun digitalas chi sun previsas da montar illas quatter fracziuns. L'incumbenza per la furniziun dals moniturs per las tablas d'infuormaziun digitalas es gnüda surdatta a la firma AlphaCom a Domat/Ems. Subit cha la pagina d'internet nouva dal cumün es pronta, cumainza la fasa da test cun ün monitor i'l Center cumünal a Zernez. Ils moniturs illas fracziuns, chi rimplazzan lura las „chaistas nairas“ existentas, gnaran montats vers prümvaira 2017.

Sarinera nouva Brail – surdatta da lavurs

Las lavurs per la sarinera nouva a Brail sun gnüdas surdattas seguaintamaing: lavurs da pittur a Josin Neuhäusler, Susch; furniziun e montascha da fanestras a René Hohenegger Sarl, Brail; izolaziun, raboccadüra externa e puntinadas a Foffa Conrad SA, Zernez; lavurs da serrüreria a Rauch Metallbau AG, Zernez; lavurs da cuvratets a Foffa Conrad Holzbau AG, Zernez e l'incumbenza per surtrar il beton cun üna vetta da protecziun a la firma Vibak AG, Wollerau.

Immundizchas - nouvs containers suotterrans

Tenor il concept da ramassamaint dal rument vegnan plazzats in Muglinè a Zernez, pro la butia Volg e pro l'arsenal a Lavin containers suotterrans (sistem molok) per ramassar il rument da chasa ed il vaider vegl. La lavur d'impresari per la montascha dals containers es gnüda surdatta ad Andri Margadant, Susch e la lavur da catram a l'Implemia (Schweiz) AG a Zernez.

Recuors cunter taxas da pumpiers 2016

Divers giuvenils chi füssan in oblig da far pumpiers han fat recuors cunter il quint da taxas da pumpiers pel 2016. Els rinfatschan cha la taxa saja per giarsuns e giuvenils chi frequentan üna scoula media massa ota. La taxa da pumpiers es gnüda facturada correct, tenor la decisiun da la suprastanza pro l'introducziun da la nouva ledscha e dal reglamaint da pumpiers l'on 2015. Ils argumaints dals giuvenils sun però inclegiantaivels ed uschè ha la suprastanza decis cha giuvenils in giarsunadi e scolaziun fin e cun 20 ons dessan gnir deliberats da la mezza taxa da pumpiers. Quista decisiun dess valair retroactiv eir per la taxa da pumpiers 2016.

Manader tecnic – procedura in connex cun las annunzchas entradas

Sün l'inserat in connex culla tschercha dal nouv manader tecnic sun entradas set annunzchas. Quatter candidats sun gnüts invidats ad ün discuors personal cul supstant respunsabel e la direcziun operativa. In seguit sun ils discuors e las respostas dals candidats gnüdas valütadas. Causa cha duos candidats han ragiunt plü o main listess blers puncts, ha la suprastanza decis da laschar valütar ad els duos tras ün specialist extern in ün uschedit „assessment“.

Turissem – dumonda per ün cusgliader extern

La cumischiun da turissem discuta daspö ün temp davart la futura collavuraziun turistica. Discuors han gnü lö cun las organisaziuns turisticas da l'Engiadin'Ota ESTM AG e da l'Engiadina Bassa TESSVM sco eir cun Grischun vacanzas. Causa la tematica fich complexa ha la cumischiun da turissem dumandà a la suprastanza cumünala da pudair ingaschar ün cusgliader extern per güdar a chattar la megltra soluziun turistica pel Cumün da Zernez. Il credit necessari es gnü deliberà.